

Landesbibliothek Oldenburg

Digitalisierung von Drucken

**Bibliotheca Smithiana, Seu Catalogus Librorum D. Josephi
Smithii Angli Per Cognomina Authorum Dispositus**

Pasquali, Giovanni Battista

Venetiis, 1755

Donati[i] Acciaioli

urn:nbn:de:gbv:45:1-844

gula agere nequaquam possunt. Accedit ad hæc & vulgata in omnes liberalitas ac mansuetudo tua, & præcipua quædam in me pietas atque munificentia, qua mihi per annos septem & viginti, & domi, & Foris munia quæque non tamquam servo, sed uti fiduciario homini mandando esse inter viros bonos voluisti, & largè donando egere meque, meosque Posteros noluisti. Quis non igitur naturæ iniuriam factam putaret, si non ipse quoque perpetua fide atque officio tibi veluti glebæ adscriptus tanquam Lari ac Genio consecrarem? Emendatum sanè opus accipies; nec si quid in emendatum offenderis, auctoris potius quam impressoris incuriam accusabis. Vale Principum decus. Mediolani. Kalend. Martii MCCCCLXXVIII.

DONATI [1] ACCIAIOLI

EXPOSITIO SUPER LIBROS ETHICORUM ARISTOTELIS.

Florentiæ apud Jacobum de Ripol MCCCCLXXVIII.

Ad Clarissimum Virum Cosmum Medicem.

Cum post interitum quorundam doctissimorum hominum studia Florentina magna ex parte remissa viderentur venit in hanc Urbem [2] Argiropylus Byzantius vir ingenio præstans summus atque Philosophus, ut iuventutem literis Græcis ac bonis artibus erudiret; iamque plures annos doctrinam tradidit nobis tanta copia, tam multiplicibus variisque sermonibus, ut visus sit temporibus nostris veterum Philosophorum memoriam renovare. Sed inter cætera Philosophiæ opera cum Aristotelis libros, qui ad Nicomacum de moribus scribuntur, mirificè esset complexus, eos tuo nomine Latinos fecit, publicèque deinde explicuit non sine magna audientium approbatione. Habent enim libri ii summam dignitatem, admirabilemque doctrinam, ordinem verò propè singularem. Itaque si accurata & exquisita quædam explanatio accedat, maguum auditoribus afferrent fructum. Quod ego iam inde ab initio mecum considerans una cum plerisque aliis, qui hujus quoque præceptoris disciplinam sequuntur, in iis audiendis

[1] Donatus Acciaiolus Senior, præclarissima gente Florentiæ natus ann. 1428, Jacobo Amanato, postmodum Card. Ticinensi, & Johanne Argyropulo præceptoribus, quàm Græcis tum Latinis literis excelluit, & Oratoris, Philosophi, ac Mathematici insigni nomine adeptus est. Patriæ suæ magistratibus pene omnibus perhonorifice functus, plures insuper suscepit legationes ad Lud. xi. Gall. Regem, Romanosque Pontifices Paullum II. Xystum IV, aliosque summos Italiæ Principes; & Mediolani tandem dum Legati munus obiret, ann. 1478. Kal. Sept. diem clausit extremum. Non deserunt qui Acciaiolum de platio postulerent, quos inter Naudæus, Vossius, Morhofius, aliique, quod veluti de suo penu depromptas expositiones hæc venditare voluisset. Sane, ait disertissimus J. M. Mazzucchellus in *Bibl. Script. Itator.* si leqissent quæ Donatus noster in Præfatione præscriperat,

utique laude & commendatione dignissimum non vituperatione faciles censuissent. Vide laud. Mazz. l. c. ubi quæ ad rem faciunt omnia, sedulo collecta pro more suo egregie recenset.

[2] Johannes Argyropulus Constantinopoli natus, nobili genere, si fides Papadopul. in *Hist. Gymn. Patav.* Romæ decessit septuagenarius ann. 1486. Testatur Jovius Argyropulum apud Cosmum Medicem summo in honore fuisse, tantaque nominis existimatione ut Petro filio nepotique Laurentio præceptorem & discipulum uno calami ductu depingit Paulus Cortesius in *Dial. de Homin. doct.* p. 42. " Joannes Argyropulus, Byzantius prope perfectus Peripateticus & sane tolerabilis Scriptor. -- " Huius auditor fuit Donatus Acciaiolus homo non indifertus & ipso orationis genere copiosus &c.

diendis præcipuam curam, diligentiamque adhibui, ut ea tantum documenta perciperem, quæ ad bonos mores & rectam vivendi rationem conferrent. Postèa verò cum viderem hos libros a te, & ab iis omnibus, qui ingenio vehementer excellunt, libentissime legi ulterius progrediendum ratus: expositionem hujus doctoris accomodatam præcipuè menti Philosophi literis mandare constitui, ut ii, qui adesse non potuerunt, & harum rerum desiderio tenerentur hæc, quæ nos ex ejus ore accepimus, percipere; & ipsi pro arbitrio possent. Quare traductionem illius ac ordinem explicandi pluribus verbis secuti sumus, lata interdum, & diffusa oratione utentes, ut explanatio aperta magis magisque omnibus esset communis. Verum tibi, Cosmæ, ac Petro Filio tuo hæc omnia accepta referri debent, quorum opera factum est, ut ex uberrimis sermonibus hujus summi Philosophi antiquorum more ad cives vestros manaret doctrina; & in Florentia urbe, in qua ceteræ artes magnoperè vigent, floreret etiam, quoad fieri potest, studium sapientiæ. Quare nemo mirari debet, si homines eruditi omnes vigilias, ac exercitationes ingenii sui ad vos potissimum deferunt. Hæc autem tuo præcipuè nomine scribenda suscepimus, quia Viro excellentissimo omni genere virtutis nullos sermones gratiores fore arbitramur, quam eos, qui de moderatione animi, de liberalitate, magnificentia, ceterisque virtutibus referuntur; in quibus tu unus tantum excellis, quantum & nos scimus, & ipsa ingens, frequens, quam de te fama declarat, quæ non contenta Italiæ finibus, longius latiusque progressa ed usque pervasit, ut apud exteras gentes tuum nomen multorum linguis atque literis celebretur. Hoc tibi gloriæ primò, ceteris deinde Civibus exemplo esse debet, ut quantum studio & labore contendere possunt, summas virtutes tuas imitentur, talesque evadant, quales Aristoteles viros felices, & omni probitate perfectos iis suis libris expressit, quos nunc in manibus habemus; ut eorum explanationem, sicut diximus, in medium afferamus præmissis antea nonnullis, quæ cognitu necessaria videbantur.

